



Davide mi veve domandât di tabaiâ, e inte sô vôs no vevi sintude la premure di cualchi di prime, cuant che cuasit fûr di sè mi veve contât di Asia.

- Grazie per jessi vignût, o ai propite bisugne di fevelâti.

- Eh bon, tranquil, pai amîs chest e altri.

- Insome, mi è capitade une robe strane îr. O jeri in coriere e fûr al jere pene stât un burlaç di chei. Il cîl al sameave che al fos dividût perfetementri in doi: a çampe al jere clâr, tu viodevis i cjamps di blave dorâts sot dal soreli, e a drete un scûr di fâ pôre, morestât di un arc di san marc.

- Senografic. Ma mi samee che in chest teatri e sedi dome la senografie, cence test e recitazion.

- No tu âs pazience! Al à ancjemò di rivâ il biel.
 - Bon, va indenant.
 - O eri in coriere e cjalavi chest cîl incredibil dividût in doi...
 - Sì... (Ce pesant che tu sês, tu e i toi viaçs mentâi)
 - O eri dut cjapât a pensâ ae bielece dai contrascj te vite...
 - Sì...
 - ...cuant che mi soi rindût cont che o vevi metût cence pensâi une man su la panze. E la sintivi cjalde cjalde.
 - Okay, dimi che no je cheste la robe incredibile.
 - E invezite sì, parcè che mi soi rindût cont cun orôr, planc, che o stevi sanganant.
 - Sanganant?
 - Sì. La man la vevi poiade su chê che o ai scuviert jessi une feride vierte, e cumò, cun onestât, o ai il sospiet di jessi muart.
 - Muart? Ma mi cjapistu pal cûl?
 - Cjale...
- Su la panze al veve une feride lungje e fonde, suiade di pôc. Si viodeve ancjemò il ros dal sanc che al rideve dai doi ôrs di piel. Mi soi sintût come san Tomas, ma piês, parcè che no si tratave dal fi di Diu ma dal gno amì Davide, che o savevi che al steve passant un periodi penç ma no pensavi cussì. Cemût vevial fat a fâsi une feride dal gjenar? Impussibil che lu ves fat bessôl. Cui lu vevie scurtissât?
- No sai cemût che al è sucedût! E no sai nancje se e je une feride reâl o metaforiche.
 - Ma ce dal diaul vûstu dî?
 - Eh, nissun mi à scurtissât la panze. O forsit no ma lu visi. Secont te isal pussibil distraisi propit intant che ti scurtissin?
 - Pardabon, no rivi a capî se tu mi stâs coionant, anzit in chest moment no capîs nuie, ma mi samee improbabil no rindisi cont che ti scurtissin.
 - Ancje jo ai pensât cussì. Duncje e à par fuarce di jessi une feride metaforiche.
 - Ma cemût metaforiche?
 - No sai! Cemût altri podistu dâi un sens? Magari mi an scurtissât chê altre dî, che mi àn dit che soi un bon di nuie, o cuant che Asia mi dite che e je stufe di me.

O ai cjalât Davide ancjemò une volte. Puar. Al jere pene stât lassât de morose e al veve ancje pierdût il lavôr. Nissun al sameave capîlu. Dome jo, ma o fasevi fente. Al jere blanc come un bleon. I voi scocolâts, al tabaiave cuntune calme sureâl che e contrastave sedi cul so aspjet miserabil, sedi cun ce che mi diseve.

- Ma duncje secont te no soi muart...?

- Ma no!

Subit mi vignì un dubi. Jerial pardabon vîf Davide? Jerio, ancjemò une volte, jo che no rivavi a capîlu?

di Margarite Cogôi